

Taarserpaa akissuteqaat 19. april 2010 ulloqartoq

Innarluutillit ukiuni qulini atuartussaataaernerup saniatiguit ilinniaqqinnissamut periarfissaasa annertusarsinnaajumallugit Naalakkersuisut pilersaarummik 2011-mi saqqummiussaqaqqullugit Inatsisartut aalajangiiffigisassaattut siunnersuut.
(Inatsisartunut ilaasorta Jane Petersen, Inuit Ataqatigiit)

Akissuteqaat

(Kultureqarnermut, Ilinniartitaanermut, ilisimatusarnermut Ilageeqarnermullu Naalakkersuisoq)

Siullermeenera

Naalakkersuisut sinnerlugit Jane Petersen, Inuit Ataqatigiit Inatsisartut aalajangiiffigisassaattut siunnersuutaanut qujaffigissavara.

Naalakkersuisut siusinnerusukkut allatigut erseqqissartanikuuaat, pingaartuummat innarluutillit innuttaasutulli allatorluinnaq pisinnaatitaaffeqlutillu pisussaaffeqlartutut isiginissaat, tamannalumi annertuummik innarluutillit pillugit inatsisiliornermi atuuppoq. Imaappoq annertuummik inaarluutillit pillugit inatsisiliornermi tamani siunertaavoq taakku sapinngisamik annertunerpaamik nalinginnaasumik inuuneqarlernissaasa qularnaarnissaat.

Tamanna aammattaaq atuarfik pillugu inatsisiliornermi atuuppoq, tassanilu assersuutigalugu immikkut atuartitsinerup siunertaraa atuartup piginnaasami iluanni pitsaanerpaamik angusaqarsinnaansaanut ikorfartornissaa.

Atuarfik pillugu peqqussummi 2002-meersumi pinngitsoorani atuartitaasussaataaneq ukiunut 10-nut allanngortinneqarpoq, aamma atuartup 20-nik ukioqalerneranut sivitsuinissamik periarfissaq atorunnaarsinneqarpoq, taamaalillunilu atuortoq kinaluunniit ukiut qulit atuartitaasussaataanini naammassiguniuk inatsisiliornermut allamut innersuunneqartarluni – atuaqqinnissamut, ilinniaqaqarnissamut inuutissarsiutitaarnissamulluunniit naleqqiullugu.

Kommunik iluarsartuusseqqinneq sulii piviusnngortinniarneqarpoq, taamaalillunilu naatsorsuutigineqarluni kommuni ukioq manna juli qaammat suliasanik innarluutilinnut tunngasunik, kiisalu Siunnersuisarfinnik PPR-nik tigusinissaat naatsorsuutigineqarluni, taamatumunnga ilanngullugu immikkut atuartitsinerup akisussaaffiginera, tamatumunnga atatillugu Naalakkersuisut piffissaq manna iluatsillugu kommunit kaammattorumavaat periarfissat ullumikkut inatsisineereersut atorluaqqullugit, atuartitsinermut, ilinniartitsinermut inuutissarsiutitaarniarnermullu tunngatillugu.

Aammattaaq assersuutigalugu sunngiffik pillugu inatsisip aalajangersagai aqutugalugit, atuartitsinermik, meeqqat atuarfiata siusinnerusukkut atuartunut 20-t tikillugit ukiulinnut atuartitaasussaataanermik sivitsuilluni periarfissarititarisartagaasa asseluinnaanik, aaqqissuussinissaq periarfissaqarpoq.

Aammattaaq periarfissaqarpoq Piareersarfiit aqutugalugit innuttaasunut pisariaqartitsisunut atuartitsinermik piukkunnarsaanernillu immikkut ittunik aaqqissuussinissaq, taamatullu piginnaanngorsaaqqinermik inatsisiliorneq periarfissiivoq, inuup sulisinnaassusilittut ukioqartup killilimmi sulisinnaassuseqalersimasup suliiinnarnissaanut sulilernissaanulluunniit ikiuinissaq, tamatumanilu

kommunit ataasiakkaat aalajangertarpaat, inuit kikkut inatsit pineqartoq aqputigalugu ikiorserneqar-nissamut piumasaqaatinik eqquutitsinersut.

Maannakkorpiaq Naalakkersuisut arlalinnik suliniuteqarput, innarluutillit isumassorneqarnissaannik ilaqartunik, soorlu Kalaallit Nunaanni efterskolinut naleqqiullugu Naalakkersuisut kissaatigaat in-narluutillit inissaqartinneqarnissaat qularnaarneqassasoq, ilinniartitsinermit peqataasinnaaqqullugit, højskolit pillugit inatsisissatut siunnersuut nutaaq sulierineqarpoq, tassanilu immikkut aaqqissuussa-mik ilinniartitsisinnaaneq periarfissinneqassalluni, kiisalu kultureqarnermut sunngiffimmullu inatsi-sit nutarterneqarnerat aallartinneqassalluni.

Taamaalilluni Naalakkersuisut pingaartippaat innarluutillit sapinngisamik annertunerpaamik nalin-ginnaasumik inuuneqarnissaminnut ikiorserneqartarnissaat, taamaammallu aamma isumaginninner-mut, peqqissutsimut ilinniartitaanermullu Naalakkersuisut maanna naapeqatigiittarfeqarput ataatsi-moorullugit suliasat oqallisigisarlugit, taakkununga ilanngullugit innarluutilinnut tunngasut.

Suliniutit qulaani pineqartut ilaattut nanginnerattullu Naalakkersuisut innarluutillit atuartinneqarne-rat ilinniartinneqarnerallu pillugu pilersaarummik ataatsimoortumik suliaqarumapput. Aammattaaq pilersaarussiaq taanna Naalakkersuisut meeqqanut inuusuttunullu suliniutaannut ilanngunneqassaaq ataqatigiissarneqarlunilu. Taamaammat Naalakkersuisut inassutigaat siunnersuut akuerineqassasoq.